

## 76 guru sertai program Empower ECER Mahkota

UTUSAN DALAM NEGERI 19 NOV 2015 m/s 27

**PEKAN 18 Nov.** - Seramai 76 guru dari 37 sekolah rendah daerah ini, Kuantan dan Bera menyertai seminar bahasa Inggeris bersama British Council yang digerakkan menerusi inisiatif program Empower Wilayah Ekonomi Pantai Timur (ECER) Mahkota.

Seminar dua hari berakhir semalam anjuran Universiti Malaysia Pahang (UMP) dengan kerjasama Majlis Pembangunan Wilayah Ekonomi Pantai Timur (ECERDC) itu diadakan di Sekolah Kebangsaan (SK) Peramu Jaya di sini.

Majlis perasmian penutup seminar berkenaan disempurnakan oleh Pegawai Daerah, Asiah Hamzah.

Yang hadir sama, Pengarah Bahasa Inggeris Untuk Sistem Pendidikan British Council, Keith O'Hare; Pengurus Besar ECERDC Pejabat Serantau Pahang, Mazlan Sharuddin dan Pengurus Projek Empower ECER Mahkota, Zainal Bahari.

Ketua Pegawai Eksekutif ECERDC, Datuk Seri Jebasingam Issace John berkata, program itu merupakan sebahagian daripada usahasama antara ECERDC dan UMP dalam memastikan peluang

pendidikan berkualiti yang sama rata dapat dinikmati murid terutama di kawasan luar bandar.

"Kami berbesar hati dengan penglibatan British Council kerana menerusi program ini, para guru bahasa Inggeris di luar bandar dapat mempelajari prinsip pengajaran dan pembelajaran bertaraf dunia.

"Saya berharap semua guru terlibat dalam seminar ini dapat memanfaatkan ilmu dipelajari sewaktu mengajar murid mereka kelak," katanya dalam kenyataan yang diedarkan oleh Empower ECER Mahkota pada program berkenaan.

Empower ECER Mahkota merupakan program pembangunan modal insan yang dilaksanakan ECERDC dengan kerjasama UMP.

Program tersebut terdiri daripada latihan untuk murid dan pelajar yang lemah dari segi akademik serta datang dari keluarga miskin khususnya mereka yang akan menduduki peperiksaan awam seperti Ujian Pencapaian Sekolah Rendah (UPSR), Pentaksiran Tingkatan Tiga (PT3) dan Sijil Pelajaran Malaysia (SPM).

Dalam seminar bahasa Inggeris

itu, jurulatih British Council memperkenalkan para guru terlibat kepada pelbagai idea dan aktiviti bantu untuk kelas mereka.

Penguasaan bahasa Inggeris penting kepada murid dan pelajar bukan sahaja untuk berjaya dalam akademik malah bagi memastikan masa depan yang lebih cerah ketika melangkah ke alam pekerjaan.

Sementara itu, seorang peserta, M. Husni Yunus, 33, berkata, seminar berkenaan begitu baik terutama bagi memantapkan penguasaan bahasa Inggeris dalam kalangan tenaga pengajar mata pelajaran tersebut.

"Sebelum latihan, peserta seminar ini menjalani analisis awal untuk mengenal pasti pengalaman, set, kemahiran, keperluan dan tahap penguasaan bahasa Inggeris masing-masing.

"Sepanjang dua hari mengikuti seminar ini, kami mendapat pelbagai teknik pengajaran baharu. Sudah pasti saya akan menyalikasikan apa yang dipelajari dalam seminar ini kepada murid saya di SK Simpan, Pekan," katanya.



SEBAHAGIAN guru bahasa Inggeris mengikuti seminar bahasa Inggeris bersama British Council di bawah inisiatif program Empower Wilayah Ekonomi Pantai Timur Mahkota di SK Peramu Jaya, Pekan, Pahang, semalam.  
- UTUSAN/AHMAD ZAKKI JILAN